

AHSENU TAKVIM (NAJLJEPŠI SKLAD)

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, kojima je Allahovo zadovoljstvo ideja vodilja i osnova za djelovanje u životu.

Uzvišeni Allah na početku sure Et-Tin (1-4.) poručuje: **"Tako mi smokve i masline, i Sinajske gore, i grada ovog sigurnog – Mi čovjeka stvaramo u skladu najljepšem."**

Braćo moja u Dini Islamu! Uzvišeni Allah je čovjeka obdario skladnim izgledom i ljepotom, koji se ogledaju kako u ljepoti njegovog fizičkog izgleda, tako i u zadivljujućoj snazi njegovog uma, što ga čini sposobnim i odgovornim da bude Allahov halifa (namjesnik) na Zemlji.

Uz to mu je dao i emocije kao regulator njegovih aktivnosti, koje ga s jedne strane povezuju sa Uzvišenim Gospodarom a sa druge strane sa ljudima i stvarima, na taj način formirajući njegov odnos prema njima, zasnovan na dva osnovna osjećanja – osjećaju ljubavi i osjećaju mržnje.

Vjernik svoje emocije gradi na vjeri u Jednog i Jedinog Boga. On voli Uzvišenog Allaha i na osnovu te ljubavi on gradi i svoje emocije prema drugima. Voli ono što Uzvišeni Allah voli i voli isključivo u ime Allaha. Voli dobrotu i ljepotu, voli dobre ljude i lijepe stvari sa kojima je povezan. Sretan je kad vidi druge ljude sretnim, raduje se kad oni čine dobra djela i uživa u društvu onih koji uživaju u pokornosti svome Gospodaru.

Isto tako, vjernik mrzi ono što mrzi i Uzvišeni Allah, i mrzi isključivo u ime Allaha. Mrzi loše, pokuđene i zabranjene stvari. Mrzi nepravdu i nema tolerancije prema kabadahijama, osjeća bol kada vidi ljude kako griješe i bori se svom snagom protiv zla i zlih ljudi koji ga okružuju.

I što je najvažnije, u svojoj ljubavi i mržnji vjernik je uvijek iskren, objektivan i pravedan. On je svjestan svoje odgovornosti pred Uzvišenim Allahom i zato je njegovo djelovanje, u cilju postizanja Allahove ljubavi i zadovoljstva, definisano pravilom koje glasi: **Vjernik ne čini nepravdu onome koga mrzi i ne griješi prema onome koga voli.**

Naravno, vjernik je svjestan da i on može da pogriješi, jer su svi ljudi griješnici, koji griješe samo zato što su nesavršeni. Najgori griješnici su oni koji griješe iz svog hira, koji ne priznaju svoje grješke i još ih pripisuju drugima i koji drugima ne praštaju njihove grješke. S druge strane, najbolji griješnici su oni koji se kaju, koji priznaju svoje grješke i koji drugima halale njihove grješke.

S tim u vezi se navodi da je Ebu Bekr es-Siddik, r.a., čiji iman je bio jači od imana svih ljudi skupa, imao jednog siromašnog rođaka kojeg je izdržavao. Međutim, kad je izbila potvora na njegovu kćerku Aišu, r.a., u potvori je učestvovao i taj njegov rođak, zbog čega se Ebu Bekr, r.a., naljutio i zakleo da mu više neće pomagati. Nakon toga Uzvišeni Allah objavljuje ajet u kome traži od imućnih da se ne zaklinju da neće pomagati rodbinu i siromašne i traži od njih da im halale njihove grješke.

Na kraju ajeta ih pita: "**Zar ne biste voljeli da i vama Allah oprostí? Allah prašta i Samilostan je.**" (En-Nur, 22.) Čim je Ebu Bekr, r.a., čuo ovaj ajet rekao je: "Da, ja želim da i meni Allah oprostí." Pa je otišao svom rođaku, dao mu hediju i zamolio ga za halal zato što je bio prestao da mu pomaže. To mogu samo veliki ljudi, iskreni vjernici, oni koji su shvatili smisao života i koji su svoje emocije pravilno postavili, tražeći prvenstveno Allahovo zadovoljstvo pa tek onda svoje.

Braćo moja, ne mogu a da ne iskažem svoje zadovoljstvo odzivom naših džematlija, i braće i sestara, na akciju pripreme i održavanja našeg džematskog Teferiča (Kermesa). Naravno, pred nama su još tri dana rada a zatim i akcija čišćenja, ali što se tiče priprema one su protekle u rekordnom vremenu i sa velikom vašom pomoći. Zato vam velika hvala i molim Dragog Allaha da vas obilno nagradi za vaš trud i izdvojeno vrijeme za naš Džemat, za našu vjeru, a samim tim i za našeg Gospodara. Neka Dragi Allah vama i vašim porodicama podari lijepo zdravlje, puno nafake i bereketa i neka vas uputi na djela kojima ćete steći Njegovo zadovoljstvo i Džennet. Amin.

Kao što rekoħ, naše aktivnosti oko Kermesa se nastavljaju. Naš Kermes počinje danas nakon džuma-namaza i završava u nedjelju popodne, akobogda. Prognoza vremena je odlična, tako da se nadamo lijepoj posjeti i još ljepšem druženju. Još jednom skrećem pažnju na parkiranje, kako ne bismo imali problema ni sa komšijama a ni sa Vogewosi-jem. Parkirajte na mjestima gdje je to dozvoljeno duž ulice, a u nedjelju dodatno i kod Albi-ja. Neka naš Kermes prođe onako kako je i započeo sa svojim pripremama – u najljepšem skladu. Jedno veliko BUJRUM svima!

Molim Dragog Allaha da u naše živote uvede najljepši sklad, da ujedini naša srca, popravi naše međusobne odnose, podari nam bereket i izliječi nas od svake tjelesne i duševne bolesti. Amin.